

28.03.2024

ԿԱՐԾԻՔ

«Օլիմպ քնսթրաքշն» ՍՊԸ-ն ընդդեմ «Հետք» ՍՊԸ-ի վերաբերյալ

Փաստերը

2020 թվականի մայիսի 29-ին «Հետք» ՍՊԸ-ն իր hetq.am լրատվական կայքում հրապարակել է [«Նորակառույցի կառուցապատողը հրաժարվում է պոմպակայանը հանձնել Ջրային կոմիտեին. բնակիչները բողոքում են»](#) վերնագրով հոդված: Այն ներկայացնում է մի պատմություն, թե ինչպես քաղաքացի Հենրի Ստեփանյանը 2018-ին գնել է բնակարան մայրաքաղաքի Նոր Նորքի Ն. Ստեփանյան փողոցի 3/6 նորակառույց շենքում, սակայն հետագայում պարզվել է, որ այդ շենքի ջրամատակարարումն իրականացնում է հենց կառուցապատող «Օլիմպ քնսթրաքշն» ՍՊԸ-ն, այլ ոչ թե «Վեոլիա ջուր» ՓԲԸ-ն: Այսինքն՝ շենքի պոմպակայանը չի գրանցվել Ջրային կոմիտեում, իսկ բնակիչները չեն հանդիսանում «Վեոլիա ջուր» ընկերության բաժանորդներ և ջրի վարձը վճարում են կառուցապատող ընկերությանը, որն էլ գումարը փոխանցում է «Վեոլիա ջուր» ՓԲԸ-ին: Հոդվածում նշվում է, որ բնակիչների դժգոհությունն է առաջացրել այն, որ «Օլիմպ քնսթրաքշն» ՍՊԸ-ն ցանկանում է զբաղվել շենքի կառավարմամբ, այդ թվում՝ ջրային վարձի հավաքմամբ ու վճարմամբ, իսկ նրանք դեմ են դրան, քանի որ մտադիր են ստեղծել համատիրություն և շենքի կառավարումն իրականացնել ինքնուրույն: Ըստ այդմ՝ շենքի պոմպակայանը պետք է համարվեր բնակիչների համատեղ սեփականությունը: Մինչդեռ բնակիչները պարզել են, որ այն պատկանում է կառուցապատողին:

2020 թվականի հունիսի 29-ին «Օլիմպ քնսթրաքշն» ՍՊԸ-ն հայցադիմում է ներկայացրել Երևանի ընդհանուր իրավասության դատարան ընդդեմ «Հետք» ՍՊԸ-ի և Հենրի Ստեփանյանի՝ Քաղաքացիական օրենսգրքի 1087.1 հոդվածի հիմքով: Հայցվորը նշել է, որ hetq.am կայքի հիմնադիրը և Հենրի Ստեփանյանը տարածել են զրպարտող բնույթի տեղեկություններ կառուցապատող ընկերության վերաբերյալ և խնդրել է պարտավորեցնել երկու պատասխանողներին հրապարակայնորեն հերքել այդ տվյալները, զրպարտության համար վճարել փոխհատուցում 2 միլիոն դրամի չափով, ինչպես նաև փոխհատուցել դատական ծախսերը:

Դատավարության նախապատրաստական փուլում հայցվորը լրատվամիջոցի մասով փոխել է հայցապահանջը, հրաժարվել իր մի շարք պնդումներից և որպես զրպարտող բնույթի

հայտարարություն է նշել միայն հոդվածի վերնագիրը, ինչի շրջանակում էլ ներկայումս շարունակվում է գործի քննությունը: «Օլիմպ Քնսթրաքշն» ՍՊԸ-ն հրաժարվել է նաև «Հետք» ՍՊԸ-ի դեմ ներկայացված գումարային փոխհատուցման պահանջից, սակայն պնդել է, որ հերքում հրապարակվի hetq.am կայքում: Մինևույն ժամանակ հայցվորը համապատասխանող Հենրի Ստեփանյանից շարունակում է պահանջել փոխհատուցում մեկ միլիոն դրամի չափով:

Իր առարկության մեջ «Հետք» ՍՊԸ-ի ներկայացուցիչը նշել է, որ հոդվածը պատրաստվել է բարեխղճորեն ու հավասարակշռված, կատարվել են մեջբերումներ Հենրի Ստեփանյանի և կառուցապատող ընկերության ղեկավարի հետ գրույցներից, հրապարակվել է Ջրային կոմիտեի ջրամատակարարման և ջրահեռացման վարչության պետի տեսակետը, այդ պետական կառույցի պատասխանը քաղաքացի Հենրի Ստեփանյանի հարցմանը, «Վեոլիա Ջուր» ՓԲԸ-ի գրությունը՝ ուղղված կառուցապատող ընկերությանը: Նաև պնդել է, որ հոդվածի վերնագիրը համապատասխանում էր հոդվածի բովանդակությանը:

2024 թվականի փետրվարին ավարտվել է դատավարության նախապատրաստական փուլը և սկսվել է դատաքննության փուլը: Առաջիկա նիստը նշանակվել է 2024 թվականի ապրիլի 18-ին:

Եզրահանգում

Հաշվի առնելով, որ հայցվորը, փոփոխելով իր պահանջները, լրատվամիջոցի մասով գրապարտություն է համարել միայն հրապարակման վերնագիրը՝ «Նորակառույցի կառուցապատողը հրաժարվում է պոմպակայանը հանձնել Ջրային կոմիտեին, բնակիչները բողոքում են», վերլուծության առարկա պետք է դառնա հենց այդ հարցը: Ըստ «Օլիմպ քնսթրաքշն» ՍՊԸ-ի՝ վերոհիշյալ արտահայտությունը չի համապատասխանում իրականությունը և արատավորել է ընկերության գործարար համբավը:

Հայցվորի այդ պնդման արդարացիությունն ու հիմնավորվածությունը որոշելու համար նախևառաջ անհրաժեշտ է պարզել, թե արդյո՞ք հոդվածում շարադրված փաստերը ներկայացվել են բարեխղճորեն ու հավասարակշռված և արդյո՞ք խնդրո առարկա վերնագիրը համապատասխանում է հրապարակման բովանդակությանը:

Խորհուրդը նկատում է, որ նյութի հեղինակը տեղեկություններ է հավաքել բազմաթիվ աղբյուրներից՝ գրուցել է շենքի բնակիչների և համատիրության նախագահի հետ (ով նաև դատական գործում համապատասխանող է), ներկայացրել է կառուցապատող ընկերության տնօրենի տեսակետն ու պնդումները, մեջբերել է Ջրային պետական կոմիտեի պաշտոնատար անձի կարծիքը: Հոդվածագիրը վկայակոչել է նաև այդ կոմիտեի և «Վեոլիա Ջուր» ՓԲԸ-ի գրությունները՝ ակտիվ հղումներով: Այս ամենից ակնհայտ է դառնում կոնֆլիկտի էությունը. շենքի բնակիչների դիմումներն անհատական բաժանորդ դառնալու համար կբավարարվեն այն դեպքում, երբ ջրամատակարարման և ջրահեռացման համակարգը, պոմպակայանն ու դրա սեփականության իրավունքը կառուցապատողի կողմից հանձնվեն «Վեոլիա Ջուր» ՓԲԸ-

ին, ինչպես նաև՝ երբ Ջրային կոմիտեում կատարվի պոմպակայանի անհրաժեշտ գրանցում: «Օլիմպ քնսթրաքշն» ՍՊԸ-ն այդ գործողությունները չի կատարել, ինչն էլ հարուցել է շենքի բնակիչների դժգոհությունը:

Խորհրդի կարծիքով՝ ծագած խնդիրը լրատվամիջոցը լուսաբանել է օբյեկտիվորեն՝ դրսևորելով բարեխղճություն փաստական տվյալները հավաքելիս և ներկայացնելիս, և պատահական չէ, որ հայցվորը դատական գործընթացի նախնական փուլում հրաժարվել է հողվածի բովանդակությանը վերաբերող իր առարկություններից: Ավելին՝ նա, լինելով կառուցապատող ընկերության ղեկավար, հողվածի հեղինակի հետ զրույցում չի հերքել, որ պոմպակայանի նկատմամբ սեփականության իրավունքը պատկանում էր իր ՍՊԸ-ին, որը չի դիմել Ջրային պետական կոմիտե՝ պոմպակայանի գրանցման համար, ինչպես նաև միջոցներ չի ձեռնարկել սեփականությունը «Վեոլիա ջուր» ՓԲԸ-ին փոխանցելու համար: Իր խոսքում հայցվորը միայն ներկայացրել է, թե ինչու այդ գործողությունները չեն կատարվել, ինչը բնավ չի նշանակում, որ հողվածում ներկայացված փաստերը չեն համապատասխանում իրականությանը:

Ինչ վերաբերում է վերնագրին, ապա Խորհուրդը գտնում է, որ այն լիովին համապատասխանում է հրապարակման բովանդակությանը, և դրանց միջև որևէ հակասություն չկա:

Ելնելով վերոգրյալից, Խորհուրդը եզրակացնում է, որ խնդրո առարկա հողվածի վերնագիրը զրպարտություն չէ, քանի որ պարունակում է տեղեկություններ, որոնց ստույգ լինելը հաստատվում է նաև հրապարակման մեջ տեղ գտած փաստերով, վկայակոչված փաստաթղթերով, պաշտոնական աղբյուրներից և մասնավոր անձանցից ստացված տվյալներով, նյութի ընդհանուր բովանդակությամբ: Հայցվոր կազմակերպության ղեկավարի՝ հողվածում ներկայացված փաստարկները համոզիչ չեն հողվածի վերնագրի ճշմարտացիությունը կասկածի տակ դնելու համար: Հետևաբար, hetq.am կայքն իր հրապարակմամբ չի արատավորել «Օլիմպ քնսթրաքշն» ՍՊԸ-ի բարի համբավը, ինչը նշանակում է, որ լրատվամիջոցի հիմնադրի դեմ ներկայացված հայցադիմումը Քաղաքացիական օրենսգրքի 1087.1 հոդվածի 3-րդ մասի իմաստով անհիմն է:

Տեղեկատվական վեճերի խորհուրդ

Շուշան Դոյդոյան (Խորհրդի քարտուղար) - Ինֆորմացիայի ազատության կենտրոնի նախագահ

Արա Ղազարյան - «Արա Ղազարյան» իրավաբանական գրասենյակի տնօրեն

Բորիս Նավասարդյան - Երևանի մամուլի ակումբի նախագահ

Արամ Աբրահամյան - «Առավոտ» օրաթերթի գլխավոր խմբագիր

Աշոտ Մելիքյան - Խոսքի ազատության պաշտպանության կոմիտեի նախագահ

Օլգա Սաֆարյան - Փաստաբան

Դավիթ Սանդուխյան - Փաստաբան